



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las seguaintas fatschendas:

Proget center da passlung Manaröl

Il cussagl cumünal ha decis cha'l proget da l'architect Jon Armon Rauch dess gnir elavurà inavant fin quist utuon, da maniera chi's haja üna basa plü detagliada per decider ils prossems pass. Il proget da Jon Armon Rauch d'eira gnü propuonü da la giuria e tschernü dal cussagl cumünal sco quel proget preferi dals trais progets stats inoltrats dals architects indigens per eriger ün center da passlung cumbinà cun abitaziuns per indigens sül areal da la piazza da parcar da Manaröl. Il cussagl cumünal ha plünavant tut cogniziun da las differentas variantas chi dà per fuormar üna cooperativa chi dess dvantar possessura da las abitaziuns chi sun previssas in quel lö. Il cussagl cumünal füss però eir avert per l'opziun cun ün investur chi less realisar svesa las abitaziuns per indigens.

Uffizi d'impostas

Sco successura da Cilgia Rest chi'd ha surtut üna nouva sfida pro üna banca, ha elet la direcziun dal cumün da Scuol a Beatrice Barba Sanna sco nouva manadra da l'allianza d'impostas. Ella es gnüda tschernüda our da plüssas annunzchas chi sun gnüdas inoltradas per quista piazza da lavur.

Las uras d'avertüra dal büro da l'allianza d'impostas in chasa cumünala ston gnir adattadas leivmaing. Las uras d'avertüra sun in avegnir da lündeschdi fin venderdi adüna da las 10.00 fin a las 12.00 e da las 14.00 fin a las 16.00 cun excepziun dal marcurdi davomezdi. Il marcurdi davomezdi resta il fanestrigl da l'allianza d'impostas serrà. Ils ulteriurs fanestrigls in chasa cumünala restan averts mincha davomezdi sco fin uossa.

Sal sün via

Il mantegnimaint da las vias d'ürant l'inviern ha dat andit quist'inviern passà a discussiuns. Impustüt pro l'adöver dal sal van las opiniuns ferm ourdglioter. Il cussagl ha decis perquai d'installar üna cumischiun chi s'occupa da la fatschenda.

Plan da quartier Polenta

Il cussagl cumünal ha deliberà il plan da fuormaziun "Polenta" (Stradun - Hotel Belvédère - Döss) per l'inoltraziun a la Regenza, quai davo chi's vaiva chattà ün cumpromiss culs recurrents.

Proget exposiziun aua minerala (BES)

La Bogn Engiadina Scuol SA, insembel cun otras instituziuns, prevezza da realisar ün'exposiziun cul tema aua minerala. Il cussagl cumünal salüda quist intent e deliberescha ün sustegn finanziel da CHF 10'000.--. Il cumün e la fundaziun Pro Aua Minerala dèssan eir esser involucadas illa concepziun da l'exposiziun.

Funtana Ravagl

L'aua da la fontana Ravagl chi's rechatta sün terrain privat cula sülla parcella d'ün pauc e pissera là per noschas cundiziuns per lavurar. Quel ha giavüschà perquai cha'l cumün piglia per mans las masüras necessarias. Il cussagl es da l'avis chi's stess laschar cular l'aua bainschi da maniera controllada, ma libra-maing per chi's possa fuormar tuf. Per chattar üna soluziun acceptabla pels possessuors da terrain pertocs tschercha la direcziun dal cumün il contact cun quels.

Gianpeder Lechthaler

Il cusglier cumünal Gianpeder Lechthaler bandunarà Scuol per motivs familiars. El sorta dal cussagl cumünal pella fin da gün 2011. Tenor constituziun cumünala nun esa da far ingüna tscherna da substituziun scha ün commember dal cussagl sorta d'urant il terz on da la perioda d'uffizi. La perioda d'uffizi va a fin als 31 december 2011.

Stradun

Il nivel dal Stradun es uossa plü o main sülla listessa otezza sco'ls marchapès. Quai ha chaschunà reacziuns positivs e negativs. Avant co far las prosmas investiziuns (p.ex. la surtratta da catram fin) esa uossa il prüm da ramassar ulteriuras experienzas, forsa eir d'oters cumüns, in mincha cas però davart dal planisader da trafic.

Xong 2010

Cun üna festa finala e da cumgià es i a fin als 31 lügl a Gluorn l'ultim Xong. Id ha dat blers rebombs positivs, ed i vain deplorà cha quist festival da cultura nu chatta plü ingüna cuntinuaziun in quista fuorma. Puchà esa impustüt pervi da la sporta multifaria e qualitativmaing fich buna e pervi dals contacts sur cunfin chi s'han sviluppats tras il Xong. Il cumün es pront da spordscher man schi vessan da nascher novas iniziativas per sportas musicalas attractivas.

Festa sül Stradun

La festa sül Stradun da quist on ha dat andit a singulas reclamaziuns davart da l'hotellaria, quai pervi da la canera e'ls stils da musica. Ils hoteliers ed us- ters d'eiran però gnüts infuormats ouravant, id es pussibel cha ün o tschel nun haja dat inavant l'infuormaziun a seis giasts.

A tscherta glied disturban eir ils divers stands cun prodots ed artichels chi nun han dachefar nöglia ne cun Scuol ne culla regiun. Il cussagl cumünal ap- pellescha a quellas personas da's participar activmaing i'l comitè per la festa sül Stradun ed avair uschea influenza sül concept da la festa.

Sustegn per l'Oasa

Il center d'inscunter Oasa exista daspö schner 2008. El nu spordscha be diffe- rents cuors, dimpersè eir sustegn personal e spiritual a personas chi tscher- chan quai, nu vöglian però ir pro'ls ravarendas. Perquai es il local eir in ün sta- bilimaint "neutral" e brich pro üna baselgia.

L'organisaziun portadra es uossa in tschercha da raps per cuntinuar culla ges- tiun. Il cussagl cumünal ha decis da conceder üna contribuziun voluntaria da CHF 3'000.-- per quist on e l'on chi vain, quai culla cundiziun cha l'Oasa schlargia sia sporta in direcziun integraziun e ch'ella detta daplü pais a la lin- gua rumantscha. Plünavant sto avair lö d'ürant ils prossems duos ons ün inscunter cul tema: Che sun incumbenzas da las baselgias e che dovairs dal cumün?

Attach Prà da Bügl

L'uffizi chantunal da construcziun bassa fa lavuors da sanaziun sülla via da dis-charg d'ürant ils prossems trais ons. Il cumün prevezza da plazzar quatter Moloks (recipiants per sachs d'immundizchas, vaider etc.) sper il suotpassagi in Prà da Bügl. Quist intent sto gnir coordinà cul proget da sanaziun dal Chantun. Il cussagl ha decis da surlaschar tuot la submissiun e la direcziun da fabrica a l'uffizi chantunal per construcziun bassa, eir pella part dal cumün, per trar a nüz sinergias e simplifichar la survaglianza dal fabricat.

Bus local

Il cussagl cumünal ha acceptà l'urari previs pella stagiun da stà 2011 chi düra dals 2 g'ün fin als 1. november. Las tariffas restan amo sco d'ürant ils ons pas- sats, siond chi'd es da far quint cun deviazziuns pervi da diversas fabricas in cumün. Il cussagl ha eir decis cha l'AutoDaPosta dess spettar culla cumprita d'ün bus nouv cun üna capacità plü gronda (75 fin 80 personas invece da 50 fin 60 personas) e da dovrar l'on chi vain amo il bus local existent, siond chi'd es plü simpel da circular cul bus pitschen tras ils differents fabricats. Quel generescha eir entradas da reclamas chi uschigliö giessan a perder.

Ils cuosts pella gestiun dal bus da stà s'amuntan a CHF 155'000.-- pella stà 2011, la lingia nova tanter la staziun e Nairs cuosta CHF 22'000.--.

Plan da quartier Val/Tof

La via d'access previsa pel quartier Val/Tof chaschuna problems. Ella tanghescha la zona da protecziun da funtanas e nu po perquai gnir fabrichada sco chi d'eira previs. Il cussagl ha decis da tscherchar ün'otra soluziun insembel culs interessents pertocs.

Val Lischana

Pella furniziun ed installaziun dals büschens pel condot da pressiun San Jon es gnüda incumbenzada üna firma da Zuoz i'l rom da l'uorden da submissiun. Ün concurrent ha uossa fat valair cha l'offerta da quella firma nu correspuonda dal tuot a las pretaisas tenor submissiun. Il cussagl cumünal vain però a la conclusiun, davo avoir consultà il büro d'indschegners incumbenzà culla submissiun, cha tant la submissiun sco eir la surdatta es gnüda fatta correctamaing.

Funtana Cotschna

L'aua da la Funtana Cotschna pudess gnir dovrada per la producziun da forza electrica cun üna pitschna turbina giò pro la punt da Lischana.

Il cussagl cumünal salüdess quist intent da princip, i's sto però valütar bain ils avantags e dischavantags. Impustüt sto restar aua avuonda per chi detta eir in avegnir la cascada sur il grip cotschen giò sco eir pel bügl sper la senda da tschella vart da la Val Lischana. Plünavant sto restar la pussibilità da retrar aua pel provedimaint cumünal in cas da s-charsdà da favrer fin avrigl sco eir aua per sauar.

Per sclerir quistas dumondas ha il cussagl cumünal deliberà ün credit.

Ledscha da fabrica, art. 50 (centers da butias)

La ledscha da fabrica actuala permetta butias cun üna surfatscha da 500 fin 1'300 m² be tanter l'areal da la posta e l'hotel Crusch Alba. Il cussagl ha gnü decis da modificchar quist artichel uschè cha talas butias sun admissas eir illas zonas da mansteranza, premiss chi nu vendan ingünas mangiativas. Quai impustüt per pussibilitar la vendita per materials da fabrica e per "Do it yourself", artichels dimena chi's chatta hoz be utrò.

Daspö ün temp demuossa üna firma chi venda mangiativas interess da drivir üna butia da 1'000 m² our'in Buorna. Il cussagl ha ponderà scha l'art. 50 da la ledscha da fabrica dess gnir müdà uschè cha quai füss pussibel. Quai per evitar cha la glied va a far las cumpritas our d'cumün o dafatta sur cunfin.

Il cussagl es però da l'avis cha la planisaziun s'haja verificada e chi nu saja güst da müdar in quist mumaint las "reglas dal gö", impustüt invers quels affars chi sun fingià al lö e chi'd han fat lur planisaziun in resguardand la pratcha plü restrictiva dal cumün.

Promoziun dals sports da naiv

Il cumün da Scuol surpiglia daspö trais ons CHF 100.-- vi dals abunamaints stagionals dals scolars, quai per promover cha'ls uffants e giuvenils gïajan sülla Motta culs skis e cull'assa. Il cussagl cumünal ha decis da cuntinuar cun quistas contribuziun eir per l'inviern 2010/11.

Surdattas da lavuors

Sarinera S-charl

- Lavuors d'impresari sarinera: Bezzola Denoth SA, Scuol
- Lavuors d'impresari chanalisaziun: Bezzola Denoth SA, Scuol
- Rastè/indrìz pel batschigl: JS Umwelttechnik AG, Hottwil
- Manisaziun ed installaziuns electricas: Brüniger & Co. AG, Cuaira
- Installaziuns sanitarias e condots suotterrans: Stecher SA, Scuol
- Sgüranza da fabrica: Die Mobiliar, Scuol

Chasa du Parc

I sun gnüdas surdattas diversas lavuors in redschia. Ils cuosts pella renovaziun da la chasa s'amuntaran a totalmaing CHF 160'000.--.

Via da Prà da Bügl

Preproget: büro d'indschegners Canclini + Peer Scrl, Scuol

Abitaziuns principalas: dischlocar ün livè

Il cussagl cumünal ha refüsà üna dumonda per dischlocar ün livè per prümas abitaziuns d'ün stabilimaint sün ün oter, siond cha las premissas per ün transferimaint tenor ledscha da fabrica nu d'eiran dattas.

Scuol, 13 settember 2010
CC 46-48

Il cussagl cumünal